

2941

2941

LE  
QV'ASTV-VEV  
de la Cour.

Ou les contre-veritez.

LE

QVASTV-VEV

de la Cour.

On les compte-venez



# LE QVASTV VEV DE LA COVR

## Ou les contre veritez.

**L**ASSE' des fatigues d'une ennuyeuse guerre, & d'un long siege, ie sortis l'autre iour hors de la ville pour m'aller promener iusqu'aux Bons hommes, & là diuertir ma melancholie, & me reioiur sur l'esperance du retour du beau temps. Comme les chemins estoient en quelques facon libres, & qu'on laissoit sortir hors les portes qui vouloit, & entrer de mesme, ie creus que peut-estre en me promenant ie pourrois faire rencontre de quelqu'un de mes amis qui viendrait de S. Germain, comme la pluspart ont suivy la Cour, y estans obligez ou par leurs charges ou par inclination. Je creus le lieu de la promenade le plus propre à mon dessein, veu que si ie l'attendois à la ville, ie ne pourrois pas apprendre si-tost la venue, & d'ailleurs qu'il seroit obligé de rendre des visites, ou d'en recevoir au mesme instant, ce qui m'empescheroit d'avoir la liberte de luy parler franchement, & luy de me dire plus particulièrement les nouvelles. Je ne me trompay point dans mon calcul & dans mon opinion, & le choix que ie fis du Cours la Reine me fut tres favorable; car apres y avoir fait un tour ou deux, & mestre diuertiy dans ma melancholie par le chât gracieux de l'aloüette, par le gazouillement de plusieurs oyssillons, & par leurs entrebaisers innocents & amoureux, apres avoir attentivement admiré le doux murmure de la riviére, l'agreable serenité de l'air, & la metueilleuse dispositiõ de la terre à recevoir sa verdure & sa beauté accoustumée. Je vis estant au bout du Cours du costé de

Chaillot reuenir vn de mes plus fidelles & intimes amis : Si-  
 tost qu'il m'apperceut il descendit de cheual ; Apres luy auoir  
 fait mon compliment , comme ayant sçeu qu'il deuoit venir ,  
 i'estois allé au deuant de luy & autres choses , il me témoigna  
 estre obligé de mes courtoisies , quoy qu'il le deut plutost à ma  
 satisfaction & à ma courtoisie. Il donna son cheual à son lac-  
 quais , & luy commanda de l'emmener à la ville , pendant que  
 nous nous en reuiendrions tous deux par le Cours. Je ne fus  
 pas marry de la resolution qu'il prit , & apres l'auoir prié assez  
 legerement de monter à cheual , voyant son refus ie receus  
 avec plaisir l'honneur qu'il me faisoit , & fus raiue d'auoir le  
 bien de sa compagnie, pour apprendre avecque plus de liberté  
 toutes les nouuelles. Apres les informations de santé de part  
 & d'autre , ie luy demanday ce qu'il auoit appris , à la Cour ,  
 mais plutost ce qu'il y auoit veu ; marchons , dit-il , j'ay bien  
 assez dequoy vous entretenir iusques à la ville. Nous nous  
 mismes donc à marcher tout doucement, lors qu'il commença  
 ce que ie vais vous dire.

Pour plaire à vostre curiosité, me dit-il, ie vous diray ce que  
 j'en sçais & ce que j'ay veu avec toute la fidelité possible. De  
 vous dire ce qui s'est passé depuis les Roys à S. Germain ; ou-  
 tre que ie serois trop long, ie sçay bien que vous l'auiez deu sça-  
 uoir, soit de la Conference à Ruel, soit de l'emprisonnement  
 de Monsieur de Rantzau. Je ne veux vous dire seulement que  
 ce que j'ay veu de fraische memoire, & que j'ay remarqué de  
 fraiche date. J'ay veu le Roy qui n'aimoit plus la chasse, qui  
 ne s'ennuyoit point d'estre à S. Germain, & qui auoit yne affe-  
 ction desordonnée pour Monsieur le Cardinal ; Je ne pûs  
 point m'empescher de l'interrompre & de luy dire, ie crois  
 que vous me faires vn récit bien estoigné du vray-semblable,  
 encore moins de la verité. Ce fut pour lors qu'il me dit que ie  
 deuois prendre garde à ce qu'il me diroit, veu qu'il n'obseruoit  
 que la methode de la Cour, qui est de flatter, & qu'ainsi ie  
 deuois m'arrester au contre-sens de tout ce qu'il alloit me di-  
 re. Je le remerciay , & luy dis que ie profiterois de cet aduis,  
 comme i'espere que d'autres qui liront ce cy en profiteront. Il  
 poursuiuit donc apres cette petite interruption, & me dit, j'ay



ven la Reine qui haïssoit à mort <sup>5</sup> Monsieur le Cardinal, qui ai-  
 moit d'un amour maternel les Parisiens, qui oubloit tout ce  
 qui s'estoit passé, qui vouloit retourner à Paris, pour y faire ses  
 deuotions à nostre Dame, & faire perdre tous les Partisans.  
 J'ay veu le petit Monsieur le Duc d'Anjou qui n'amoit point  
 Paris, & qui sollicitoit le Roy à demeurer tousiours à S. Ger-  
 main, qui caressoit Monsieur le Cardinal, & qui n'estoit plus  
 d'humeur iouiale comme il auoit accoustumé, pour le déplai-  
 sir qu'il auoit de voir qu'on vouloit retourner bientoist à Paris.  
 J'ay veu Monsieur le Duc d'Orleans ferme dans ses resolutiōs  
 hair Paris, mespriser l'Abbé de la Riviere, pour escouter fa-  
 uorablement Madame sa femme, & Mademoiselle sa fille, &  
 vouloir aller terracer luy seul toute l'armée Parisienne. J'ay  
 veu Madame n'aymer plus à prier Dieu, aymer l'Abbé de la  
 Riviere, hair les Parisiens, & demander leur perte & la destru-  
 ction de leur ville, sur tout du Palais d'Orleans. J'ay veu Ma-  
 demoiselle sans ressentiment, voir agir tout le monde sans rien  
 dire, ne plus parler à personne, solliciter Monsieur son pere à  
 conseruer l'Abbé de la Riviere qu'elle caressoit comme tres-  
 affectionné pour son seruice, & à ruiner entierement tout Pa-  
 ris. J'ay veu Madame la Princeesse douairiere ne vouloir plus  
 prester d'argent à personne, & rendre celuy qu'elle auoit re-  
 ceu pour le Roy, afin d'entretenir l'armée de Monsieur son fils,  
 que j'ay veu fort deuot se souuenir des bonnes leçons des Pe-  
 res Iesuites, ne plus laisser agir sa colere, ne iurer plus Dieu,  
 deuenir meur, oublier tout ce qui s'est passé, auoir de l'affec-  
 tion pour les Parisiens, r'emmener son armée en Flandres,  
 & enuoyer à tous les Diabes le Cardinal & les partisans. J'ay  
 veu Madame sa femme n'estre plus ioyeuse d'estre mere, & n'a-  
 uoir plus de complaisance pour la Reine. J'ay veu Monsieur  
 le Comte d'Harcourt fort aise d'aller combattre les troupes de  
 Monsieur de Longueuille & ne respirer hautement que la rui-  
 ne de toute la France. J'ay veu Monsieur le Duc de Mercœur  
 impatient, extrememēt courageux, blasmer Monsieur son frere  
 d'indiscretion & de peu de courage, & vouloir aller combattre  
 toute son armée. J'ay veu Monsieur de Mêts n'aimer plus la  
 peinture & la chasse, se defaire de tous ses tableaux & de tous

ses chiens, n'aimer plus à faire la debauche, & vouloir mener vne vie tres retirée. I'ay veu le vieux Monsieur d'Angoulesme venide Grosbois demander à genoux vne charge dans l'armée sous Monsieur le Prince, & respirer la perte de tout le Royaume. I'ay veu Madame de Guise employer tous les moyens qu'elle iuge estre necessaire pour sortir de prison Monsieur le Duc son fils, & pour le marier avec Madamoiselle de Pont. I'ay veu Messieurs ses autres fils n'auoir aucun ressentiment de ce qu'on auoit fait à Meudon. & louer toute l'entreprise de la guerre. I'ay veu Monsieur de Nemours en dessein de venir querir Madame sa femme durant ces suspensions d'armes, & vouloir emmener le Roy à Lyon, pour les bons offices que les Lyonois rendirēt à deffunct Mōsieur son pere. I'ay veu madame de Senecey blasmer les Iesuites de flatterie, ne les vouloir plus ouïr, & prendre contr'eux le party des Iansenistes. I'ay veu Madame sa fille ne le porter plus haut, mespriser le tabours que la Reine luy auoit donné, & faire oster de dessus son carrosse la Couronne de Prince. I'ay veu Monsieur le Duc d'Vzès l'espée au poing offrir ses seruices à Monsieur le Prince pour commander dans son armée. I'ay veu Madame de la Roche Guyon, vouloir suiure amiablement les auis de Monsieur son beau pere & de Madame sa belle mere, & vouloir finir ses iours dans vn paisible veufuage.

I'ay veu Monsieur le Cardinal oubliant la maxime de son pays oublier tout, accuser Monsieur le Prince de trop de violence, Monsieur le Duc d'Orleans de trop de douceur, la Reine de trop de credulité, vouloir venir resioiur les Parisiens de sa veuë, & leur faire amande honorable de tout le tort qu'il leur a fait. I'ay veu l'Abbé de la Riuiere changer de poil & de façon, n'auoir plus dessein de vendre son Maistre, mespriser les presens du Cardinal, n'auoir point d'ambition pour vn chapeau rouge, & vouloir retourner dans Paris, pour recognoistre la bassesse de sa naissance, & demeurer avec sa mere dans la rue saint Honoré. I'ay veu l'Euesque d'Alby Abbé de Beaumont se vouloir defaire de tous ses benefices pour conseruer Alby, & donner de tres bons preceptes au Roy. Comme le genereux Marechal de Villeroy n'a autre dessein que de ramener



le roy à Paris, & de ne laisser plus passer à Lyon aucuns iustes qui iroient en Italie. I'ay veu le Marechal de Schomberg iurer hautement la ruine de tout le Royaume, & son desordre. I'ay veu le Marechal de l'hospital persuader à la Reine qu'elle ne doit respirer que la vengeance. I'ay veu le Marechal Rantzau se declarer coupable du crime qu'on luy impute, & en attendre la punition avec impatience. I'ay veu le marechal de la mesleraye n'estre plus affligé de la goutte, ne plus iurer Dieu, n'estre plus impatient, demander pardon à Dieu de toutes ses offenses, & vouloir marier son fils avec vne des nieces du Cardinal. I'ay veu le marechal de Grandmont temeraire au dernier point se repentir d'auoir fait ouurir les passages pour laisser venir les viures à Paris. I'ay veu monsieur le Chancellier ne vouloir plus signer aucunes lettres de Noblesse, renoncer à tous les partis, sur tout à celuy des bouës, & Conseiller à la Reine, le prompt retour de leurs maiestés dans Paris. I'ay veu messieurs de Guenegaud & le Tellier, ne vouloir plus rien signer, ny pour le Conseil ny pour la guerre, & monsieur de Guenegaud se ressouenant de la naissance de son pere, faire cas de tous les laquais. I'ay veu le Commandeur de l'arre ne point desauouer la familiarité qu'il a eüe avec monsieur d'Emery. I'ay veu Messieurs de Saineterre, Tubeuf & Beautru disgraciés, pour n'auoir pas assez protégé Monsieur le Cardinal, & pour auoir conseillé l'extinction du Prest. Duquel i'ay veu les sieurs Bonneau, la Railliere & Catelan ne se plus soucier en demandant eux mesmes la suppression. Enfin i'ay veu les filles de la Reine, n'aimer plus à parler à personne, bannir les mouches & les affiquets, & les gens de guerre ne plus voler, brusler, ny violer, veu la deffence qu'on leur en a faicte.

Il commença ces discours au commencement du Cours, & nous estions à la porte de la Conference quand il l'acheua, & là ie le remerciay de sa bonne compagnie, de ses bonnes nouvelles, & ie pris congé de luy quand il gagna la rue saint Honoré, pardeuant les Thuilleries, & moy ie gagnay la rue saint Anthoine par la valée de misere.

F I N.

